

1 Tesalonika

¹ Pol, Sailas, Timoti,
amā, Tesalonika sios Tamada Negur, Odug Jesus Kristus ado bun ufaregef ā bun, pas enei matotof:
Wau ifenēya wau inosiya ado ā bun ibodōf.

Tesalonika Neid Momoiya Nigin De Fiyēya

² Amā faimud ā ganan nigin Negur de mafiye ken, nemā kosē bun ā nigin marokenēdig.
³ Amā neda Negur Tamada mala bun, momoiya bunem āgenei kabī faat yuk, wauī laa fiya bunem āgenei kabī yaleya ado, neda Odug Jesus Kristus bun wauī ise fen, ā to fese gen anī toku karī mauledig.

⁴ Turamā tar, Negur ā nigin wau laa fedig anī, amā keleī, are Negur ī ā igirnein,

⁵ ere nigin, nemā biya od ā bun isin, are od dogol bunem sā, anī ere, megeir ado, Awa Uur Fateul ado, momoiya bagai ado, ā bun isin. Ā atun, ā nigin naig be ma mabodon anī ā keleī.

⁶ Ā, amā Odug Jesus geid madē wamāgen. Ā darau odug adon, anī ere, Awa Uur Fateulem kulīya ifenein anī bun, ā od anī walegen.

⁷ Anī nigin, ā Masedonia Akaia provins ado bun, momoiya tamo kayau ganan neid dodo gen wowā gen.

⁸ Odug nē od ā bunem ilen, Masedonia Akaia provins ado bun dogol sā, āgenei Negur nigin

momoiya anī fō fō ganan iyokelen. Anī nigin amā baban ā ereb to mayeīf.

⁹ Idi dogo, ā amā naig ge walemāgen anī kurō difalaisi kanamak. Age de fen, ā naig ge idegēya waitou utorōg fen, Negur bun falei ge, mata ibodōya nē ado momoi nē Negur aruna waleg fen,

¹⁰ Ī Naal ī laa bunem turī fiyen, are Jesus ī didi dumen isiyouf bun tamal kel yaledadig anī, saa ilun tamal tari gen anī dirokanamak.

2

Pol Tesalonika Oun Kabī Yalen

¹ Turamā tar, ā keleī, amā nemā ki yeīya ege to ilen.

² Ā keleī, amā Filipai taun oun darau ado kono fiya malen, anī ere, neda Negur nē isennēya bunem amā totol mano fen, naabura gudū fiya totol ibod mog, in biya od wogō mayein.

³ Amā totol bagai marokeneik are, kū fenēya bunem sā, kisi sane bunem sā, idegneīya bune-meg sā.

⁴ Age fiya ban, Negur biya od wogōya nigin igirneīd fen, yo fiyēdin anidim gen, amā wogō maudig. Amā tamo waud al fouf nigin to kabī malef, anī ere, Negur ī wauda es fedig, ī wau al fouf nigin kabī malef.

⁵ Ā keleī, amā meleī yaleya nigin to bagai wogō mau fen, naumamā nigin to nawamā dede mafedig. Are amā momoi morok anī Negur ī keleī.

⁶ Amā tamom yanamā seli kulō difouf nigin to mamiren, ā bunem sā, takā bunemeg sā.

Amā Kristus nē aposel mau fen, amā sā morō mafeneī yoū nē,

⁷ anī ere, ā atun, amā molol nem kesu sina gere tar kulatun fedidig gen, age mafen.

⁸ Amā ā nigin waumā fatuk laaf fen, amā Negur nē biya od ifeneīya nigin dogol sā, nemā mata ā nigin iraileya nagineg waumā iron, ere nigin, ā amā bun oboimā bagai wowā gen.

⁹ Turamā tar, momoi, amā kabī totol morō ado malen anī ā karī welegef. Amā morō ā taka to mafeneif nigin, bō ado gaa ado kabī male fen, Negur nē biya od ā bun wogō maun.

¹⁰ Ā, momooya tamo atun, amā naig be mafen, fateul, madur bagai, od sā mafaren, are ā keleī, Negureg keleī.

¹¹ Ā keleī, are amā, tama ī gere tar nigin suma inodig gen, ā mugu mugu bun suma manon,

¹² amā wauī malesedig, wowor mayeīdig, Negur ī yogon tano ado fula fiya medeīya bun ulagauf nigin iweigneik, ī orof kilei ā ubodōgouf nigin, wedereī maroudig.

¹³ Age ma fen, amāg toku Negur de mafiyēdig, ere nigin, sain ā Negur nē od amā bunem karīg fen, walegen, are tamo nē od gen to walegen, Negur nē od bagai walegen, Negur nē od anī, momoi gef ā bun kabī yalef.

¹⁴ Turamā tar, ā oun Judia distrik Negur nē sios madē wiyēdigen. Sios Judia distrik oun Kristus Jesus bun difaref, Juda tamo bun darau dalen gen bagai, āg fō tureī tar bun darau walegen.

¹⁵ Juda tamo idi, Odug Jesus profet geid di-denkeis fen, amāg dirumā dirailen. Idi Negur

wau al fiya to difenen, idi tamo ganan kiwai difenēdif.

¹⁶ Idi neid tobonuneid bun, amā haiden wogō mafiyēdi di, isennēyā dalouf nigin naaburamā gudū difedig. Naab anī bunem, faimud idi neid mosor tete tete dife di, mudu isedig. Age fiya nigin, Negur nē didi kisi feleya bagai, idi bun mogo isin.

Pol Tesalonika Ileya Nigin Fatuk Bagai Wau Iron

¹⁷ Anī ere, turamā tar, sain modeg bun, ã geid tabodon anī fara mafen (are bouwamam, kisim sā), amā ã ileyeīyā nigin fatuk bagai waumā iro ken, naab ganan bun kabī totol malen.

¹⁸ Amā ã gein masiyouf nigin waumā yenен. Momoi, aya, Pol, baba baban lakī afen. Anī ere, Satan naaburamā katī felen.

¹⁹ Neda Odug Jesus isiyouf bun, ere anī ī mala bun, nemā wau iseya, kulīyā, yana yaleseya nē teter youf? Are ã anī sā de?

²⁰ Momoi, ã nemā fula fiya medeīyā ado, nemā kulīyā.

3

¹ Anī nigin, amā foiya kisi feleya sā nigin, amā kisi ma fen, amā mugu ein Atens mabodōf are deuf maun.

² Amā, ã āgenei momooya bun megeir yei ken, wauī yalesauf nigin, Timoti, ī nemā turamā ado Kristus nē biya od nigin Negur nē kabī tura, sur mafiyen.

3 Are takam morō eneidi bun to kisi rori youf nigin age mafen. ã gai keleĩ bagai, are ada morō eneidi nigin igirnadan.

4 Momoi, amā ã geid tabodon bun, amā, ada fau darau difanadauf nigin toku marokenein. Age fiya bagai, agef wō yen, are ã keleĩ.

5 Anī nigin, aya foiya kisi feleya sā kisi afe fen, aya āgenei momooya ileya nigin sur afen. Aya, naab taka taka bun kisi fiya tamo kisi yeĩ di, nemā kabī totol ege ileya nigin kumī aun.

Timotim Pol Od Biya Iroulekenen

6 Anī ere, Timoti gama bagai, ã bun tamal amā gein isi fen, āgenei momooya ado wauī laa fiya nigin od biya irou isin. Í irokanaman, are ã, amā nigin faimud biya karī welegedig ado, amā ã ileyeÿa nigin waumā irōdig gen, ãg ilemāÿa nigin wauī irōdig yen.

7 Anī nigin, turamā tar, amā nemā waumā morō ado, darau ganan bun, āgenei momooya bunem, amā ã nigin waumā yalesen.

8 Gama amā waumā kulīÿa ado mata mabodok, ere nigin, ã Odug bun megeir ufaregef.

9 Neda Negur mala bun, amā ã nigin waumā kulīÿa ifanaman enei ganan nigin, naig ma abag kisi mafel, ã nigin Negur de mafiyēf?

10 Amā masi mailiyei ken, ereb ã fau āgenei momooya bun lau gef anī isenneÿa nigin, bō ado gaa ado Negur totol bagai kosē mafiyēdig.

11 Gama, neda Negur Tamada ï yogo, neda Odug Jesus ado, nemā naab ã gein isiya nigin dūf nigin oromak.

12 Odug ãgenei wauĩ laa fiya gire fese di, amã ã nigin waumã laa fedig age fiya gen, abob nigin ado ganan nigin wauĩ laa fiya gogũ fouf nigin oromak.

13 Negur ĩ, ãgenei wauĩ megeir fe di, neda Odug Jesus, in fateul tamo kayau ganan geid disiyouf sain bun, neda Negur Tamada mala bun, ã bouweĩ od sã fateul wô gouf nigin oromak.

4

Mata Ibodõya Bun Negur Wau Al Fiya Ifenẽya

1 Od idĩya nigin, turamã tar, amã, ã Negur wau al fiya wenẽgouf nigin naig ge ufaragauf nigin mafelnein, are gama agog ufaregef. Gama amã ã enei baba baban ago gouf nigin to mayei ken, Odug Jesus bun totol bagai marokeneik.

2 Odug Jesus nẽ totol bunem, amã ã faded fiya mafenein, are ã keleĩ.

3 Negur nẽ oroya are ã fateul wowã gouf anĩ, are ã noli toboununã sese wiyẽgouf.

4 ã mugu mugu bouweĩ kulatun ge di, fateul fen, yeneĩ biyauf nigin keleĩ youf.

5 Haiden Negur keleĩ sam, noli nigin mudureid ditenẽdig gen to ago gouf.

6 Enei bun, takam ne tura sane to age fiyẽf, idegẽya bunem morõ to ifenẽf. Amã mogo marokenei ken, wedereĩ maroun, are Odug fau mosor age fediya ganan nigin tamo mala solo ifenẽdiyouf.

7 Negur ada amuyẽ adouf nigin to iweignadan, anĩ ere, fateul ibodõya nigin iweignadan.

8 Anī nigin, taka ī od enei idodōf, ī tamo to idodnek, are Negur in Awa Uur Fateul ifeneīdig anī idodnek.

9 Gama tureī tar nigin wauī laa fiya anī nigin amā to matotkeneīf, ere nigin, ā aug abob nigin wauī laa fouf nigin Negurem ifelnein.

10 Momoi, ā tureī tar ganan Masedonia provins ganan bun difaref anidi nigin wauī laa fedig. Anī ere, turamā tar, ā baba baban ago gouf nigin totol bagai marokeneik.

11 Amā marokenein gen, ā molol ibodōya nigin kisi totol walogouf, āgenei kabī nigin kisig fen, aug imeim kabī walogouf.

12 Anī bunem, āgenei ibodōya bun tamo serē temeleid dileyei ken, anini douf, taka bun to utobōgouf.

Odug Isiyouf

13 Turamā tar, amā ā gare den onudi nigin to keleī youf anī to oromak, takag, tamo tunī ganan, wau iseya sā gen wauī gudū fouf anī to oromak.

14 Jesus laaf fen, kel fā yen nigin ada momoi tauf, anī nigin, Negur, idi Jesus bun gare den anidi, Jesus geid guri feid isiyouf nigin momoi tauf.

15 Odug nē od bunem, amā ā marokeneik, are ada fau mata tabodok, Odug isiyouf bun tafaref ada, idi gare den anidi to bagai wal tafediyouf.

16 Odug yogo bagai saa ilunem isiyouf, ait odugem irō di, engel uyu irouya nē ait ado, Negur nē taur bunem iweig di, Kristus bun gare den anidi ketemfafā douf.

¹⁷ Anī bure fele di, ada fau mata tabod ken, tafaref anī geif, idi geid bagu fada fen, lalo bun kutū fada se, Odug fotou fiya nigin saa ilun irou iselnadauf. An ada Odug geid mata gai gai tabodkalauf.

¹⁸ Anī nigin, od enei bunem abob wau talesauf.

5

¹ Gama, turamā tar, amā sain ado naa nigin to matotkeneif.

² Ere nigin, ã keleī bagai, Odug nē naa, bē tamo bō isiyouf gen wō youf.

³ Tamо kayau wau inosiya ado morō sā tabodok de mog, daū fiya nunū idi bun, kayau kesu gō fiya nigin firi yedig gen isi di, idi to diyalalauf.

⁴ Anī ere, turamā tar, ã gugum bun to ufaregef, anī nigin, naa anī bē tamо gen to isi fen, ba yeif.

⁵ Æ ganan lalan ado we bun temelei. Ada bō ado gugum nē sā.

⁶ Anī nigin, ada, idi tunī denek gen to tafarauf, anī ere, ada lo tafel fen, karī adouf.

⁷ Are idi mulaī temeleid, bō anī denēdig, idi aai meleid waī yedig, bō anī aai meleid waī yedig.

⁸ Anī ere, ada we nē nigin, ada dug nigin karī ado fen, momoiya wau laa fiya ado siot kapa gen tafoun ken, kel gei fiya nē wau iseya anim hat kapa gen kurū tafouf.

⁹ Negur ada didi yaleya nigin to igirnadan, anī ere, ada neda Odug Jesus Kristus bunem kel gei fadauf nigin igirnadan.

¹⁰ Í ada nigin laa fen, are ada mata be tabodok, gare be tauf are, í geid tabodōf nigin age fen.

11 Anĩ nigin, abob wau tales fen, abob wale-sagauf, gama ago gef gen.

Idikeleya Nẽ Faded Fiya

12 Turamã tar, gama amã marokeneik, idi ã atun kabĩ totol dalef, idi Odug bun ägenei uyu irouya difar fen, wedereī dirouf anidi karĩ wiyëdigouf.

13 Idi kabĩ dirouf nigin ge fen, idi nigin wauĩ laaf fen, fatuk bagai karĩ wiyëdigouf. Abob nigin wau inosiya bun ufaragauf.

14 Turamã tar, amã totol bagai marokeneik, fõ temeleid wedereid uroug, anini temeleid waud waleseg fen, forõ temeleid usennëdigouf, ganan nigin nameī ukeleg ubodõgouf.

15 Taka nem taka nẽ mosor to solo fouf, anĩ ere, abob nigin ado ganan nigin, faimud tobonuna biya ago gouf.

16 Wauĩ bun faimud kulĩ youf,

17 toku kosẽ gouf,

18 ereb ereb ganan bun de wiyëgouf, ere nigin, are ã nigin Kristus Jesus bun Negur nẽ oroya.

19 Awa Uur nẽ yã to uroroukeleg,

20 profet neid od to welebi ge.

21 Ereb ereb ganan es gouf. Biya anĩ uroug, kafĩ walagauf.

22 Ereb sesen fire fire ganan sese gouf.

23 Negur ũ yogo, wau inosiya nẽ Negur, fateul kisi feleya bagai inoyeif. Ägenei uur, meleïkanon ado, bouweī anĩ ganan, neda Odug Jesus Kristus isiyouf bun od sãf.

24 ũ iweigneik ũ yogon od dõ fiya biya, ũ de age fouf.

25 Turamã tar, amã nigin kosẽg.

26 Tureĩ tar ganan, umã fiya fateul bunem aan wedig.

27 Aya, tureĩ tar ganan bun pas enei ujesagauf nigin, Odug mala bun totol bagai arokeneik.

28 Neda Odug Jesus Kristus nẽ wau ifenẽya ã ado ibodõf.

**Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Mar 2025 from source files
dated 31 Aug 2023

d7099f9d-3bdf-5620-8eb3-7e6c51cab7ea